

Aruba a participa den Festival di buki di mucha 2005 na Bonaire



ORANJESTAD (AAN): Diadomingo pasa, dia 11 di november, e apertura di e festival di buki di mucha 2005 di Bonaire a tuma lugar. Bonaire tambe a dicidi pa tuma e tema di Kinderboekenweek 2005 over pa asina e por comparti e Magia cu a laga Aruba encantá pa un siman largo.

Na Bonaire e fundacion local JePoBon, a logra realisa e festival e aña aki cu sosten di entre otro SEK/SKAL, Artebon y Film en Podiumkunsten Bonaire. Mescos cu na Aruba, na Antiyas tambe e festival di buki di mucha aki den pasado tabata worde organiza door di Stichting N.A.N.A., cu pa motibo di e.o. fondo no ta organiza e evento aki mas. Bonaire pa e motibo aki a dicidi di sigui e ehempel di Aruba pa no laga e magia bay perdi.

Diputado Geraldine Dammers, asisti pa presidente di e fundacion local JePoBon, señora Maria Elena Domacassé, a pronuncia e palabranan

magico pa inicia e siman di festival di buki: "Hocus Pocus Pas". Y e dos magonan di e festival di buki di mucha 2005 a aparece dilanti e publico Boneriano cu tabata bon anima e atardi aki. Señora Roxiana Goeloe, contado di cuenta di Bonaire y escritora di Aruba señora Liliana

Braamskamp-Erasmus, a aplica nan formula magico na tur e schoolnan di Bonaire. Y aunke nan Magia no a logra cambia e mal tempo cu a pone hopi school yena cu awa, si nan a logra cu Bonaire completo a disfruta di lesa buki. Especialmente e buki di e festival 2005, HOPUS, cu mescos cu na Aruba a worde regala cu cada compra di un buki di mucha na Bonaire tambe.

Lamentablemente, e cantidad di buki di HOPUS no a yega pa tur e amantenan di buki na Bonaire. Na Aruba tambe e exito di HOPUS tabata mas grandi cu a spera. Ta e Biblioteca Nacional di Aruba y tambe biblioteca Publico di Bonaire por



complace tur esnan cu no a logra adkiri nan HOPUS, cu algun ehemplar di e buki aki cu nan por presta.

Festival di buki di mucha 2005 a pone chikito y grandi disfruta di e mundo magico di lesamento na Aruba y tambe na Bonaire. Na tur organizacion y persona cu a contribui na un manera of otro na e exito di e festival aki, ta bay palabranan di elogio pa e tremendo trabao. Cu mas organizacion y persona uni pa asina logra nan metanan, pasobra ta union ta forza, y un biaha mas esaki a worde comproba. Pabien cu un Festival di Buki di Mucha exitoso... Awor mester prepara pa 2006.